

# 1,000 penonton meriahkan Malam

## Pesta Cahaya UMP

umc (Hello Kampus) 27/10 115/26

KUANTAN 26 Okt. – Kira-kira 1,000 penonton yang terdiri daripada penuntut institusi pengajian tinggi (IPT) dan masyarakat sekitar daerah ini membanjiri Kompleks Sukan Universiti Malaysia Pahang (UMP) bagi memeriahkan Malam Pesta Cahaya, baru-baru ini.

Turut memeriahkan sambutan anjuran Kelab Kebudayaan dan Kesenian UMP itu ialah pelajar kolej swasta daripada Kolej Olympia, Kolej Shahputra, Kolej Kejururawatan Kuantan dan Kolej Komuniti Kuantan.

Pada program tersebut, pengunjung disajikan dengan persembahan kebudayaan masyarakat India seperti tarian Allegra, Paalakadu, Banghra, Tanikai dan teater yang dipersembahkan mahasiswa UMP.

Penuntut kaum Melayu dan Cina turut membuat persembahan tarian tradisional masing-masing sebagai gimik perasmian yang turut menarik perhatian penonton.

Pengarah program, B. Jagatis berkata, program julung kali itu bertujuan memupuk semangat perpaduan di kalangan warga UMP dengan masyarakat setempat di samping mengenali budaya kaum India.

Katanya yang merupakan pelajar Fakulti Kejuruteraan Mekanikal UMP, selain itu, penganjuran program bertemakan 1Malaysia tersebut dapat memupuk semangat perpaduan antara kaum serta mengeratkan lagi hubungan antara IPT lain.

“Saya gembira dengan sambutan yang amat menggalakkan daripada warga IPT dan masyarakat setempat di sini sekali gus dapat merapatkan hubungan antara kaum,” katanya ketika ditemui pada program tersebut.

Sementara itu, Pegawai Kebudayaan UMP, Mohd. Zaki Ahmad berkata, Jabatan Hal Ehwal Pelajar dan Alumni UMP menyokong penuh usaha yang dilakukan penuntut universiti itu terutama aktiviti melibatkan pelbagai kaum.

Katanya, penganjuran program itu dapat melatih golongan mahasiswa membangunkan *soft skills* dan persediaan melahirkan graduan yang lebih berdaya saing setelah tamat pengajian nanti.